

Transkript sa konferencije za medije međunarodnih organizacija

OHR, Mario Brkić

OSCE, Aida Bešić

EUPM, Zinaida Ilaria

EUFOR, Jem Thomas

OHR

OHR i NATO o BOSS amandmanima na Zakone u oblasti reforme odbrane

Dom naroda Parlamenta FBiH će sutra razmatrati predložene amandmane na već usvojene zakone u oblasti reformi odbrane.

Ovi amandmani, koje je predložio BOSS, bili bi korak unazad u odnosu na ono što je postignuto u uspješnom procesu reformi u oblasti odbrane i ponovo bi oživjeli Ministarstvo odbrane F BiH. Gašenje ovog Ministarstva, zajedno sa Ministarstvom odbrane RS, bilo je od centralnog značaja za stvaranje jedinstvene vojne strukture u BiH koja je kompatibilna sa NATO-om.

Ako bi Parlament F BiH donio ove amandmane, nastala bi institucionalna i pravna konfuzija.

Predloženi amandmani, ako bi bili usvjeni, poslali bi negativan signal o spremnosti BiH da bude vjerodostojan kandidat za NATO-ov program Partnerstvo za mir i o ispunjenosti uslova postojanja efikasne komande i kontrole na državnom nivou.

OHR i NATO ove amandmane smatraju prijetnjom reformama odbrane

koje su BiH dovele na prag Partnerstva za mir, i koje trenutno provodi Ministarstvo odbrane BiH.

OSCE

Šesnaest autora udžbenika historije iz BiH na seminaru u Njemačkoj

Institut Georg-Eckert za međunarodno istraživanje udžbenika u Njemačkoj, u saradnji s Misijom OSCE-a u Bosni i Hercegovini i Vijećem Evrope, organizirao je seminar za šesnaest autora udžbenika historije iz BiH, u Braunschweigu, u Njemačkoj, u periodu od 13. do 17. februara 2006. godine.

Svrha seminara je usavršavanje u osnovnim metodologijama i vještinama pisanja udžbenika historije.

Seminar je rezultat nedavno potpisanih Smjernica za pisanje i ocjenu udžbenika za osnovne i srednje škole u Bosni i Hercegovini. Seminar predstavlja praktičnu implementaciju Preporuka o podučavanju historije u Evropi XXI stoljeća, koje su usvojile države članice Vijeća Evrope, uključujući Bosnu i Hercegovinu.

EUPM

Nije bilo izjave.

EUFOR

Nije bilo izjave.

Pitanja i odgovori:

Antonio Prlenda, Oslobođenje:

Mario, rekao si «pravna konfuzija» da bi bila. Samo komentar pošto je sve u ovom trenutku ustvari pravna konfuzija, jer ustvari ne zna se recimo kada neki bivši pripadnik oružanih snaga iz rata traži potvrdu da je bio u vojsci ne zna kome da se obrati jeli Državnom ministarstvu ili Federalnom – to je jedna stvar. Druga stvar, pitanje nekih pečata u Federalnom ministarstvu da ovjerite neke dokumente ako neki pečat nije legalan onda šta da pečatiraju? Znam da moja kolegica u piše na tu temu. Također ima još tu problema vezanih za, znači da u biti jeste sada neka pravna konfuzija.

Mario Brkić, OHR:

To je sve u procesu tranzicije, znači sa entitetskih ministarstava u potpunosti da pređe na državne. Ovo bi po nama bilo samo dodatno dolijevanje konfuzije.

Antonio Prlenda, Oslobođenje:

Očekujete li neke rokove da se brže riješe ti administrativni problemi koji sada postoje, činjenicom da je to tranzicija?

Mario Brkić, OHR:

Postoje siguran sam, određene da kažem, vremenske smjernice u kojima se trebaju završiti određeni procesi tranzicije entitetskih ministarstava. Meni zaista nisu poznate, ali sa ovakvim potezima – ovim amandmanima – sigurno to što vi govorite bi bilo još, da kažem, produženo.

Antonio Prlenda, Oslobođenje:

Recite mi, ljudi koji su tužili Federalno ministarstvo odbrane za plate – sad tko zastupa bivše Federalno ministarstvo odbrane na sudovima tim? Znači kada si rekao «pravna konfuzija», pravna konfuzija još postoji.

Mario Brkić, OHR:

Da, ovo samo dodaje na postojeću situaciju.